



**REGOLAMENT CUN CRITERIS E MODALITÂTS PE INDIVIDUAZION DI OPARIS DI CUISTÂ  
PE PROMOZION DE LENGHE FURLANE**

*Fat bon cun Deliberazion dal Consei di Aministrazion n. 20 dai 20 di Març dal 2014,  
integrât e modificât cun Deliberazion dal Consei di Aministrazion n. 34 dai 24 di  
Setembar dal 2015.*

## **Regolament cun criteris e modalitâts pe individuazion di oparis di cuistâ pe promozion de lenghe furlane**

Art. 1 finalitâts

Art. 2 oparis di podê cuistâ

Art. 3 modalitâts di intervent

Art. 4 distribuzion des oparis

Art. 5 limits di spese

Art. 5-bis fatturazion eletroniche

Art. 6 rimant

Art. 7 jentrade in vore

Art. 8 normis transitoriis

### **Art. 1 finalitâts**

1. Chest Regolament al dissipline i criteris e lis modalitâts pe individuazion di oparis di cuistâ pe promozion de lenghe furlane di bande de Agjenzie Regionâl pe Lenghe Furlane, in atuazion des finalitâts previodudis dal articul 2 dal Statût.

### **Art. 2 oparis di podê cuistâ**

1. Pe atuazion dai intervents contignûts tal articul 1, a vegnin individuadis publicazions, includudis lis produzionis audiovisivis e multimediâls, che si caraterizin par un nivel alt di cualitât e, in particolâr, par:

- a) la coerence cu lis finalitâts dal Plan gjenerâl di politiche linguistiche pe lenghe furlane;
- b) l'apuart significatîf ae atuazion di une politiche linguistiche adate a promovi l'ûs dal furlan in ogni situazion de vite moderne;
- c) la informazion e la promozion in setôrs di grant interès pal aument dal status de lenghe furlane.

### **Art. 3 modalitâts di intervent**

1. Cun riferiment aes oparis individuadis daûr dal articul 2, la ARLeF e interven midiant dal acuist di esemplârs editâts.

2. I sogjets interessâts a puedin presentâ propuestis di ufierte economiche, cu la specificazion des cundizions di vendite miôr a pet di chês di marcjât, cun in zonte un esemplâr de opare, ancje dome in formât electronic, daûr des modalitâts fissadis dal Comitât tecnic scientific.

3. I criteris pe individuazion des oparis a son stabilîts dal Comitât tecnic scientific.

4. La individuazion des oparis i spiete al Comitât tecnic scientific tignint cont dai criteris dal come 3, cun riferiment aes ufiertis rivadis dentri dal tiermin fissât dal Comitât stes.

5. Lis modalitâts di presentazion des ufiertis, il tiermin e i criteris pe individuazion des oparis a son fats savê almancul trente dîs prin de scjadince cu la publicazion sul sît istituzionâl de Agjenzie, cuntun bant di pueste.

### **Art. 4 distribuzion des oparis**

1. Pe lôr difusion, lis oparis cuistadis su la fonde di chest Regolament a son distribuidis sore nuie:

- a) aes bibliotechis, aes istituzion culturâls, ai istitûts scolastics, aes Universitâts e a ogni altri sogjet stimât idonei, tignint cont de nature de opare;

- b) ai singui citadins, su domande dai stes, li de sede de ARLeF;
- c) par finalitâts di rapresentance istituzionâl.

#### **Art. 5 limits di spese**

1. La spese in merit a ogni singul intervent fat su la fonde di chest Regolament no pues jessi di plui di euros 20.000,00.
2. Nol è ametût il frazionament artificiôs di furniduris che a àn caratar unitari par disviâ la limitazion contignude tal come 1.

#### **Art. 5-bis fatturazion eletroniche**

1. I sogjets furnidôrs des oparis che si tratin in chest Regolament si impegnin a emeti fature pe furnidure midiant de fatturazion eletroniche, daûr des modalitâts in vore.

#### **Art. 6 rimant**

1. Par chel che nol è previodût di chest Regolament si aplichin lis normis contignudis tal Regolament pe acquisizion in economie di bens e di servizis di bande des Direzion centrâls e dai Servizis de Aministrazion Regjonâl, dât fûr cun Decret dal President de Regjon ai 5 di Otubar dal 2010, n. 0216/Pres.

#### **Art. 7 jentrade in vore**

1. Chest Regolament al ven inserît te racuelte dai regolaments de ARLeF e al è metût in vore la zornade dopo de sô publicazion sul sît internet de ARLeF.

#### **Art. 8 normis transitoriis**

1. Lis integrazions e lis modifichis zontadis cun Deliberazion dal Consei di Aministrazion n. 34 dai 24 di Setembar dal 2015 a jentrin in vore la dì stesse de publicazion coordinade dal Regolament sul sît internet de ARLeF.
2. Lis integrazions e lis modifichis dal come 1 si aplichin ancje ai procediments in cors ae date de lôr aprovazion e no ancjemò sierâts.